

Sebarang masalah dalam Angkatan Tentera

# Mahathir beri jaminan akan mengatasinya...



■ DATUK SERI DR MAHATHIR

**KUALA LUMPUR, Khamis —** Perdana Menteri, Datuk Seri Dr. Mahathir Mohamad hari ini memberi jaminan, beliau akan menggunakan kuasa yang ada untuk mengatasi sebarang masalah yang dihadapi dalam Angkatan Tentera.

Datuk Seri Dr. Mahathir yang juga Menteri Pertahanan berkata, terdapat beberapa masalah yang harus diatasi oleh Kementerian terutama dalam proses pembesaran Angkatan Tentera sekarang.

## Nasihat penting

Menurutnya, akibat beberapa masalah yang timbul, beberapa rancangan angkatan tentera tergendala dan ketinggalan.

Ini termasuk pembelian barang-barang dan pembinaan bangunan serta tempat-tempat untuk tentera.

Datuk Seri Dr. Mahathir menegaskan, tumpuan yang akan diberikan sekarang ialah soal pelaksanaan.

"Negara kita tidak mempunyai masalah kewangan mahupun perancangan, tetapi masalah sekarang ialah soal pelaksanaan," jelasnya.

Tambahnya, pelaksanaan tergendala adalah disebabkan tidak dapat mengatasi sesuatu keadaan dan kelewatan.

Datuk Seri Dr. Mahathir menjelaskan demikian kepada para pemberita setelah mengambil alih tugas sebagai Menteri Pertahanan hari ini.

Dalam lawatan lebih empat jam itu beliau memberi amaran dan nasihat penting kepada pegawai-pegawai tertinggi Angkatan Tentera mengenai tanggungjawab dan tugas mereka kepada negara.

Perdana Menteri diberi taklimat mengenai beberapa perkara penting secara umum dan rancangan masa depan Angkatan Tentera dan menyatakan banyannya terhadap kejayaan yang telah dicapai dalam memajukan Angkatan Tentera sebagai tulang belakang keselamatan negara.

Taklimat disampaikan oleh Ketua Setiausaha Kementerian, Tan Sri Mohamed Yusof Abdul Rahman, Panglima Angkatan Tentera, Jeneral Tan Sri Mohamed Ghazali

Seth dan Ketua Staf Operasi, Major Jeneral Datuk Hashim Ali.

Datuk Seri Dr. Mahathir seterusnya berkata, taklimat-taklimat khas dan perbincangan-perbincangan akan diadakan dari masa ke masa untuk membolehkan beliau memahami dengan lebih luas dan mendalam mengenai Angkatan Tentera.

Ini akan juga membolehkan beliau mengetahui dengan lebih dekat dan mengambil bahagian dalam menyelesaikan masalah-masalah yang timbul.

## Memeriksa

Datuk Seri Dr. Mahathir juga menyatakan gembiranya atas kerjasama yang ditunjukkan oleh kakitangan awam dan anggota-anggota tentera.

Menurutnya, ini menunjukkan kakitangan berkeinginan sadar tentang tanggungjawab mereka dan peranan yang harus dimainkan.

Selain dari anggota-anggota tentera, kakitangan awam juga memainkan peranan penting mewujudkan angkatan bersenjata yang kukuh.

Ketibaan Datuk Seri Dr. Mahathir disambut oleh Timbalan Menteri Pertahanan, Abang Abu Bakar Datuk Bandar Abang Haji Mustapha, Panglima Angkatan Tentera, Jeneral Tan Sri Mohamed Ghazali Seth dan Ketua Setiausaha Kementerian, Tan Sri Mohamed Yusof Abdul Rahman.

Dalam upacara penuh tradisi tentera itu, Perdana Menteri juga memeriksa kawalan kehormatan 105 orang anggota dan pegawai dari ketiga-tiga perkhidmatan — darat, laut dan udara di bawah perintah Major Ariffin Shah Mohamed. Pasukan Pancaragam Kavalri di Raja memainkan lagu-lagu tentera ketika Datuk Seri Dr. Mahathir berjalan lalu memeriksa perbarisan tersebut.

Bahan asal dari Arkib  
Negara Malaysia